

De Kwakel

CV de Moerebuuk
Jaorgank 51



**Prins Tonny I
Prinses Anouk**

**CAMOUFLAGE ANE KANTJ,
WAE STORME DOOR 'T
MOEËRELANDJ**

**MÈT ÓS GEIT 'T WAAL LEKKER
MER 'T KAN NOG VEUL GEKKER!**



**Jeugdprins Sven
Jeugdprinses Lise**



Vastelaovendj 2016



'Proklamatie'



Beste Moeërebuuk en Moeërinne,

Ich Prins Tonny I, 65ste prins vanne Moerebuuk.

Aodste zoon van Jac van Smeeds Teun en Loes van aod prins Theu van Palmen-Driek.
Gebore in 't zekehoes in Wieërt en opgegrudj oppe Antoniusstraot in Èll.

As dörpsmins bèn ich dèk te vinje bie ein van de vereniginge waat 't dörpke Èll riek is.

Òm te beginne op 't voetbalveldj woeëdet ich dit jaor al 24 jaor actief lid van bèn. Dao hób ich 10 jaor ónger de lat gestange bie 't ieëste en 't hoeëgst hoolbare bereiktj: ein kampioensjap in 2014. Waat ein fieëst waas det! Sinds det jaor hób ich ein stepke ómhoeëg gedaon nao 't twieëdje. Woeëdet ich as keeper en voetballer nog good ónger de veut oet kan.

Bestuurslid van 't KVW woeëdet ich eder jaor bie de versjillendje activiteite de veiligheid in de gate haoj. Hieveur organiseer ich bieveurbeeldj de EHBO-aovendj veuraafgaondj aan de waek zoeëdet de aojers heur kinjer mèt ein geróstj hert aan de leiding euver kinne laote.

In de KVW-waek knutsel ich same mèt 't KAC noew spelle inein en organisere wae de kampvuuraovendj.

4 Kieër p'r jaor in de bosse te vinje óm minse de stoepe op 't lief te jage tiejes ein van de spoëketochte van Stichting Spook.

Artiest oppe bóntje aovendj in de groep Proem, woeëdet gae mich dit jaor ouch weer zultj zeen as wae 't stök aaf kriege.

Eine kieër p'r jaor te vinje in Assen, woeëdet ich mèt eine geweldjige groep moog genete van de camping tiejes de TT van Assen.

'n Sjoëën hobby begónne in de verheur van leecht en geluid veur de kleinere fieëste same mèt Tim Eerkens of te wel TnT. 't Is inmiddels al get oet de kluite gewasse zoeë-as gae zeetj.

Lid van vastelaovendj- en vrinjevereniging de Prutsers, woeëmèt wae versjillendje jaore en nog steeds mètdoon aan de leedjesaovendje en/of optochte.

Adjudant gewaestj van Aod-Prins Jesper, woeëdet ich al get aafgekeke hób. Sindsdien ouch lid gebleve van CV de Moerebuuk óm zoeë veul meugelik mèt te make op vastelaoves gebied.

Veur de óntspanning drink ich gaer ein glaas beer in ein van de Èller cafés mer ouch thoes oppe bank woeë den 't speciaal beer op taofel kumptj.

Tösse de hobby's door wirk ich ouch nog.

Al 12 jaor as militair, mèt as hoeëgdjepuntj de oetzending nao Afghanistan in 2006-2007. Ouch dao 'n klein bietje de vastelaovendj mèt kinne make door te belle tiejes de priesoetrekking van de optocht woeëdet VV de Prutsers toen de 1ste pries bie de wagens hoojdje en de Wisselmoeër wón.

Al 8 jaor same mèt mien Prinses Anouk. Wae zeen, nao eine tössestop op Kunnekoel, belandj in de buurt de Pannestert. Wae zeen nog steeds bezig óm van ós hoes ós paradies te make.

Ich verklaor bie de gratie van Groeëtvorst Jan, Vorst Henri en de raod van Elf 't volgendje:

- Det ich same mèt prinses Anouk, mien adjudante Jesper, Rob en Jochem en heur dames Maartje, Anouk en Laura veurop gaon in de strijd óm d'r eine ónvergaetelikke vastelaovendj van te make.
- Det wae dit same doon mèt Jeugdprins Sven en Jeugdprinses Lise.
- Det wae same mèt uch tot aan Aswoonsdig storme door 't Moeërelandj.
- Det wae dit 't leefste doon ónger begeleiding van de Ellenthaler en van de Kaolderbend.
- Det wae det dit jaor mèt z'n 10ne doon, t'rwiel gae d'r mer 8 op de bühne zeetj staon.
- Det ós Henry neet as adjudant naeve mich steit, mer det t'r as ome Henry verder door 't laeve geit. Dit hëljt in det t'r bie eder activiteit d'rbie moog zeen, mer den neet in ein pak en zónger verplichtinge.
- Det de Prutsers, 7 Groeëte en 1 Piep en de Brandblussers minimaal mèt doon as groeëte groep inne optocht. Mèt de intensie óm de Wisselmoeër te winne.



DET ICH MÈT DEES DAAG ZAL REGERE IN DE ORDE VANNE BARET.

EN DIT ALLES ÓNGER MIEN MOTTO:

**CAMOUFLAGE ANE KANTJ,
WAE STORME DOOR 'T MOEËRELANDJ**



WISJ DJ'RAL...



De Kwakel

Jaorgank 51

- Det Teun (7 jaor) gaer raekentj
- Det Berend (39 jaor) 'm vroeg: "waat is de wortel van 9?"
- Det Saar (4 jaor) toen zagt: "waat is de appel van 4?"



Snel d'r in en neet d'roet!

As prins hób se 't d'r mer drök mèt. Naodet t'r mèt die van 't Wieërterlandj oppe foto waas gezatte, most hae zich spoje óm bie de Uffelse Meule te kómme, want in Haler stinge alle prinse oet Leudal te springe óm mèt de prins van 't Moeërelandj oppe foto te moge. Ze wore get ane late kantj, mer gelökkig waas gans veuraan nog ein parkeerplaats vrie en Paul steurdje behenjig in. Wie de foto gemaaktj waas treuzeldje hae flink en wachdje mèt instappe tot alle anger prinse vertrócht wore. Mèt oetstappe haaj d'r gemerktj det 't get drassig waas... en jaowaal huer: hae zaat moorvast; de wage kwaam neet veur- of achteroet. 't Waas dus toch neet zoeë slum óm hum dao nieër te zette.

De boum steit ... al bekans

Bie Leen van Sjang van Doeër achteróm sting eine groeëte denneboum. De Dörpsraad mocht dae geróstj kómme hole óm op 't plein te zette. Drek waerdje d'r vanalles geregeldj: Tjeu van Lemme en Hub vanne Baars kwome sjörge en Corrie kwaam mèt óm de lempkes d'r in te hange. Lambair van Hover kwaam mèt de verrijker veur 't zwaore werk en Theo vd Berkmortel zat ein berichtje in 't Leudalnieuws. En Fer waas d'r ouch. Bie Leen aangekómme bleek det allemaol neet zoeë mèkkelik as gedachtj; ze koste mèt de traktor neet tot ane boum kómme.

Wie Ton van Sjang opperdje óm mèt 4 man te höffe, brook bie Fer 't zweit oet. 's Waeks d'rop sting d'r ein sjoëen bericht in 't Leudal-krentje, mer op 't plein waas geine boum te bekinne. Dae hóbbe ze zaoterdigs d'rnao in Rooj gehoordj, zoeëdet d'r mèt kerst toch 'ne sjoëne boum op 't plein sting.

Waat 'n verdreet.

Paul en Ana en 't hundje Sole wore mèt 't dageliks wanjelrundje bezig wie ze bie Peter en Thea langs lepe. In eine kieër "waf, waf.." dao kwaam Binky van Peter en Thea achteróm. Det gebeurtj waal dèkker mèt anger hunj dus lepe Paul en Ana röstig door. Mer Binky haaj good gezeen det Sole net dae daag nao de trimsalon waas gewaestj en hae haaj drek inne gate det ze luips waas. Dae mót dus gedachtj hóbbe "Hey ... ein lekker chikkie, die is veur mich!" Paul reep nog op Peter óm zien hundje trök te rope, mer Peter waas de hék tösse hum en Ard in 't fatsoen aant sjaere, dae huerdje niks. "Kóm," zeet Paul tege Ana, "wae loupe door, det hundje zal dalik waal ómdreije." Mer Binky bleef op aafstandj mètloupe, door de Meuleveldjweeg hieëlemaol mèt nao de Swartbrookstraot. Aaf en toe "tss .. tss .. gank heives" rope haaj niks geholpe. In plaats van trök op heives aan stook Binky ouch de straot euver en leep, nog steeds ein bietje op aafstandj, mèt oppe fietsepaad langs 't voetbalveldj. Óngertösse waas 't hieële tafereeltje inne Meidoornstraot aanbelandj en Binky waas stiekem al get korterbie gekómme. En ... Sole bleef aaf en toe staan! De leefdje kwaam dus inmiddels van twee kenj! Jao, de leefdje waas óngertösse zoeë hevig det normaal wanjele haost neet mieër meugelik waas. "Wèt se waat," zeet Paul, "ich draag Sole gewuuen en as wae thoes zeen bel ich Thea." Zoeë gezagdj zoeë gedaon, snel op heives aan en Binky nog steeds achter 't gezelsjap aan. Einmaal thoes bleef Binky veur de veurdeur zitte janke en ane binnekantj klónk Sole 'tzelfde. Waat 'n lijd! Paul beldje Thea mer snel en verteldje 't hieële verhaol. "Waaaaaaaat ???" reep Thea ane telefoon, ich dacht det dae boete bie Peter waas. Binne 'n paar minute kwome ze Binky ophole, waat waas die bieëstjes toch ein verdreet aangedaon ...

Ein krats mieër of minder

Esther kumtj inmiddels zón 3 jaor in Èll en de minse beginne heur te herkinne, veural aan de blauw bus woeë ze in riedtj. Veur degene die heur neet kinne, laote we zegge die bus heet al hieël get mètgemaaktj en det straoltj d'r van aaf. Wie Esther ins bie 'sjoënzus' Marianne oppe koffie waas, mook Marianne zich drök euver ein möske det ónger de carport aan 't bouwe waas. Det dingske vloog aaf en aan mèt tekskes en zoeë, sjoëen óm te zeen. Mer jeh, ze haaj net eine splintjer-noewe auto en ze waas toch waal bang det det bieëst kratse zoj make inne lak. "Mer nae," verzekertj Esther druueg, "ich hób det ouch waal ins gadj. En ich zeen gein kratse oppe wage van zo'n klein veugelke!"

Doan eur veut pien inne schoan,
dan kint ge bie Bep, Bianca, Jantien of Evi de veut loate doan!

Medisch Pedicure Bep van Oosterhout



Scheijmansplein 5, Èll / St. Willibrordusstraat 10, Nederweert
Bel vur un aafspreek noa; 0495 55 23 64 of 06 5435 8227



De Kwakel

Jaorgank 51



De verwachtde vertraging is ein oor en drie-en-vieftig minute

Bas van Dael ging op stap in Indjove. Hae haaj good doorgehoojd en pakdje smörge de ieëste trein trök nao hoes.

Al snel kwaam hae d'r achter det t'r inne foute trein waas gestaptj. Bas leet zich neet kinne, stadj in Den Bosch gewuuen oet en pakdje geliek de trein trök nao 't zuide. 'n Klein oor later waerdje hae wakker van ein stum: "Deurne, station Deurne". Dju nae, ich ben in slaop gevalle! D'r zaat niks anges op as mer weer oetstappe en de ieëst-volgendje trein trök nao Indjove te pakke, dao staptje d'r gelökkig drek in de goje trein nao Wieërt!



Bienao eine hieële deure plafond

Henrie van Daniëlle heet hout nuuedig veur de plafonds. Óngerweeg nao zien werk beltj hae mèt de houthanjel, handsfree zoeë wie 't huuertj! Henrie zoj Henrie neet zeen as hae neet zoj probere óm get van de pries aaf te pingele. Dae mins ane angere kantj van de lien beloofd det hae d'r 'n sjoeën prieske van zal make en det hae de offerte door zal maile. Henrie is inmiddels oppe snelweeg in 'n riej langzaamrijendj verkieër belandj.

Op 't moment det hae 't geluid van 'n binnekómmendj mailtje huuertj paktj t'jr ziene telefoon óm te kieke of de offerte binne is gekómme. Erg benoedj of det t'r 'n paar euro d'rvan heet kinne ritsele, zoj toch sjoeën mètgenómme zeen!! Op 't moment det Henrie op ziene telefoon kiekj, zuut t'r 'ne motor naeve zich ... Dju, des 'ne plies! Dae pliesieman vreugtj Henrie óm ziene auto naeve de weeg te zette en wiltj de autopapere en riebewies zeen. Hae stèltj allerlei vraoge en Henrie geuftj braaf antjwoord. As menieër de pliesie-agent klaor is mèt zien vraog en antjwoordspelke heet Henrie ein vraog aan hum:

"Ich weit det ich fout waas, kintj gae mich zègge wie hoeëg de boete is?"

Haaj dae effe gelök det ze bie de plies juist dae daag aan 't stake wore en daoróm gein boetes oetsjreve!

Anges waas 't asnog 'ne deure plafond gewaesjtj!!



Woeërom Siem gein muntjes gebroektj!

Ed van Heijkers zoot kirmismaondig bie Siem aan de bar en woeë net gaon bielègge widedet d'r zich bedacht det hae gister nog ein paar velle bónne haaj gekocht. Hae beldje nao hoes en vroog of emes zien bónne kost kómme bringe: "Die zitte in die bóks van gister." Zien mate sjote hum alvast eine groeëte veur.

"Pap, hie zeen dien bónne", zegt Leonne en ze duudje hum eine versjrómpeldje, zeik-nate houp gekleurdj papeer inne henj. Siem haaj 't verhaol mètgekregene en begost te gniffele:

"Kiek, en daoróm wirk ich neet mèt muntjes! njeh njeh njeh"



SIEM & SIEM

FERMATE

Muziekproducties • Dirigeren • Arrangeren • Componeren •
 Produceren • Registreren • Presenteren •
 Dialectpop • Artiestenbegeleiding • Projectcombo •
 Advies m.b.t. muziekprojecten • 'Studio Linje'

06-55703344 • INFO@FERMATE.NL • WWW.FERMATE.NL

Passendj!

Op 'ne röstige zunjig middig zote ein deil man bie Siem aan de bar. Siem haaj voetbal opstaon en keek vol verwachting nao vrieje trap dae genómme móst waere. De bal ging mèt ein rotvaart de krusing in, precies zoeë det de kieper d'r noeëts bie kost. Siem dreitj zich óm en zeet innegang:

"Dju Wim, det pastj baeter as die koziene van dich! njeh njeh njeh"

LANDGOED

Lemmenhof

Oppe tribune

De dames Robin, Anouk en Maartje ginge op 16 januari eine daag d'roet. "Fijn," zagte Luuk, Tonny en Jesper "den kinne wae bie Siem óngestueerdj nao Ajax-Groninge kieke! Lekker mèt 'ne pot beer d'rbie." Tiejes de wêdstried kriege ze alle drie 'n appje binne mèt 'n foto van de dames, ze zote inne ArenA mèt de shirts van die jóng aan!



De Kwakel

Jaorgank 51

Vreemdje auto

'n Paar kiëer per jaor gaon de dames van " 't aafwasbörstelke" d'rop oet mèt z'n vere. Aafgeloupe veurjaor haje ze bedachtj óm tapas te gaon aete in Wieërt. D'r waerdje euver van alles gekaltj: 't werk, de kinjer, 't hoeshaoje en ouch euver de kaerels! Ein van de vrouwluu haaj 'ns gehueerdj det kaerels nao heur vieftigste óf gaon motorrieje óf vreemdjgaon!! Dao waerdje flink óm gelache, want dao zoge de betreffendje dames toch veural de humor van in. Heur manne haje nog neet allemaol dae laeftied bereiktj. Mer de twee die d'r waal al de vief veur haje staon ... haje gein motorriebewies. Yvon van Logtestijn waas dae aovendj BOB en naodet ze ederein thoes haaj aafgezatte en heur eige hoes naderdje sjrók ze zich kapot ... d'r sting 'ne vreemdje auto oppe oprit!!!! 't Zal toch neet?? Erik waas tenslotte de vieftig gepasseerdj én haaj geine motor ... dus ... Mét ein kloppendj hert ging ze nao binne, veurzichtig de trap op, de aafwasbörstel inne aanslaag. Erik laag gewuuen in bèd ... allein! Veur de zekerheid toch nog mer effe ónger 't bèd en in de kast gekeke, mer niks vreemds aangetroffe. Dus Yvon kost mèt 'n gerórstj hert gaon slaope. En dae vreemdje auto? Dae haaj Micky bie zich gadj, gelieëndj van ziene baas.



Paol haoje

Aafgeloupe jaor haaj de kapel van Swartbrook jubileum fieëst. Oet de hieële ómtrék wore kapelle oetgenuuedj óm d'r eine gezellige aovendj van te make. De Koalderbend waas ouch oetgenuuedj en nateurlik haje die dao zin in. Alle instrumente waerdje staags d'rveur bie Ron Mertens inne bus gezatte, want hae zoj die mèt numme. De aovendj verleep gezellig en dao wore al ein paar kapelle ane beurt gewaestj toen ein van die manne zagt: "Woeë blijft Ronny? Wae zeen binne neet al te lange tied ane beurt en wae hóbbe nog gein instrumente." "Wae wachte nog effe en anges gaon wae mer 'ns belle woeë d'r blijft", zagt de verstenjigste toen. Wie ze Ronny oeteindelik ane telefoon haje zeet dae: "Jao, jao... ich wil waal kómme mer ich kan neet mèt mien bus vanne oprit aaf, want **miene paol is bevrore!!**"



**Ich haoj hieël
hel van dich!**

Hae waas gaon aete bie de Griek en daonao nog eine gaon drinke. Wie d'r thoes de fiets nieërzat bedacht t'r zich: "Ich kan mer baeter oppe bank slaope vannacht, den maak ich Sandra neet wakker, want die mót mörge weer vreug op." Zoeë gedacht, zoeë gedaon. Bram poetsdje zien tenj, paktje ein deke en lagt zich oppe bank. Wie d'r net laag, bedacht hae det 't waal leef zoj zeen óm nog effe ein nachtkusje te gaeve. Dus sting hae weer op en leep hieël stillekes nao de slaopkamer. Net op 't moment det t'r zich veureuver boog, verloor hae zien aevewicht en ... in plaats van ein kusje kreeg Sandra eine liefdevolle kopstoeët!

<h3>Winkelmolen v.o.f.</h3> <p>MEUBEL- & TIMMERWERKEN</p>	<p>Hoopstraat 36a 5813 JZ, Eindhoven Telefoon: 0495 551619 Mobiel: 06 23 615 485 E-mail: kwinkelmolen@planet.nl</p>
---	---

Zeuke tot des se ein óns weugst

Sjan haaj heure noewe motor precies eine daag, wie ze mèt det dink nao ein voetbaltoernooitje ging kieke. Sportief as ze is, stampdje ze zelf ouch get tege 'n belke. Tot ze zich inins realiseerdje det ze de sleutel neet inne tes haaj. De wêdstried waerdje gestaaktj en ederein op 't voetbalveldj zocht mèt. Mer dae sleutel waerdje neet gevónje en Sjan móst echt weg. Dus d'r waerdje vanalles in 't gare gehange óm dae motor thoes te kriege en zelf waerdje ze opgehóoldj. Ein paar oor later kreeg ze 'n appje: Bès se diene jas soms ouch kwiet? Welke jas? Jeh, dae inne kantien euver ein kruk hingtj, dae mèt det sleutelke inne tes.

	<p>06 29 51 82 87 06 46 15 18 44</p>
<h1>TINT</h1>	
<p>TIM & TONNY AUDIO- LICHT- EN KARAOKEVERHUUR ELL</p>	

De Kwakel

Jaorgank 51

'Optocht oetsleeg'

WAGES



Wisselbeker

WV EUNJ

- 1e pries mè 143 puntje:
"Oze vastelaovendj geit wie eine trein"
- 2e pries mè 140 puntje: "Wae sjuuve alles aan de kartj"
- VV Eine Chaos
- 3e pries mè 135 puntje: "Alle hens aan dek, vastelaovendj is te gek"
- VV Pan Aaf

VV de Vervaelers

- 1e pries mè 142,5 puntje:
"De lamp ging oet, d'n duvel is los de spanning in ut moerelandj is begost"
- 2e pries mè 138,5 puntje: "Wae steele de show" - Platvesse met Kuurt
- 3e pries mè 138 puntje: "Wae maete 3 daag piekspanning"
- Sjutterie kei kepot

GROEËTE GROEPE



KLEIN GROEPE



De Plekkers

- 1e pries mè 138 puntje:
"Wae pieken met dees daag"
- 2e pries mè 127 puntje: "Eller dans Ma-3-tjes" - Golden Girls
- 3e pries mè 119,5 puntje: "Wae drieje zelf..." - Des neet verkiertj

Hub Peter Willekens

- 1e pries mè 130,5 puntje
"Mèt Hub in Paries gaon ich veur de 1ste pries"
- 2e pries mè 130 puntje: "Alcohol vrie beer is wie eine BH oppe wasdraod" - Peter Seerden

EINZELGÄNGERS



'Koffie mèt de vorst'



**Bèste Moeërebuuk ,
Aafgeloupe jaor is Prins Paul 2e ózze Èller vastelaovendj
veurop gegange. Hae waerdje biegestange door zien prinses
Joyce en heur adjudante Robert, Bart en Chris en de adjudant
dames Odile, Marjon en Petra.
Vorst Henri keek mèt Paul trök. Hie volgtj ein samenvatting van
dae trökblik.**

Paul, waat heet dich 't meiste verrastj mèt die daag?



Op de ieëste plaats de Raod van Elf en de dames van de Raod, waat die allemaol doon achter de sjerme is neet te misse. De ónverwachtje momente die óntzettend gezellig wore zoeë-as minse die 't hoes kwome versere en den nog bleve plekke veur ein tas koffie of 'n fles beer. En de kaartverkoup vanne bóntje aovendj dae get langer doordje as ich haaj verwachtj.

Besjrief 'ns waat se veuldjes mèt de optocht dao bove oppe prinsewage.

Veur de optocht waas ich nog neet hieëlemaol herstèldj van de aovendj d'rveur.

Mer wie de optocht begost te trèkke, haaj ich nörges mieër last van, det waas echt geniete. 't Is sjiek óm te zien wie alle optochtdeilnummers veurbie trèkke en veural as d'r deilnummers bie zeen die speciaal veur mich get bedacht hóbbe. De huuegdje waas veur mich gein probleem allein veur mien prinses Joyce waas 't effe winne. En den, as se zoeë door 't dörp rieds, is 't geweldjig en ein oetzicht det ich noeëts zal vergeate.

Dink se achteraf oeëts: "Det haaj ich nog wille zègge of mètmake? Of det hób ich gemistj?"

Ich hób niks gemistj, laote wae det veurop stèlle. Ich hób van edere daag genote. Ich hób nao ieër en gewete op dinsdigaovendj ederein bedanktj. Mer de belangriekste persoeën, mien leef Prinses Joyce, bèn ich dae aovendj hieëlemaol vergaete te bedancke. Ze heet 't mich gelökkig vergaewe.

Is dich get biezunjers opgevalle?

Laot ich veuropstèlle det ich alles sjiek vónj. Bie de kinjer optocht veel mich echt op det dae van ein hoeëg niveau is. Dao moge wae as dörp trots op zeen. Ich stóng as aod wagebouwer te kieke van de sjieke creaties die d'r bie wore, groeët of klein mer perfect aangewirktj en daobie sjieke kleijer. Allemaol groepkes die hopelik de kómmendje jaore mèt de Èller optocht mèt blieve doon.



Waat achteraf bekeke de keus vanne adjudante good, of haat se baeter angere kinne vraoge?

De keus van mien adjudante waas al gemaaktj 5 minute naodet ich gevraagdj waas óm prins te weare. Mèt dees keuze haaj ich eine brok ervaring naeve mich staon en daobie zeen 't ouch verstenjige men en dames die mich good in gate hele wannieër ich eine spa-vla nuuedig haaj. Mèt ein half woord haje wae al dèk genógt. Zónger heur waas 't neet gelóktj.

Waat zoot se de noewe prins as advies wille mètgaeve?

Maak dich absoluut neet drök euver waat allemaol kómme geit. Laot alles euver dich haer kómme en hób geine stress. Spraek vanoet dien hert, spontaan en waat in dich opkumtj. Mekkelikker kan neet. Pak dien röst, baeter eine daag teveul vrie den eine halve te weinig. Maak d'r ein fieëst van want dit is dien jaor, doe kriegs eine kieër dees kans dus pak die.

Paul, bedanktj veur deze trökblik. Ich wil dich en de hieële groep bedanke veur 'n fantastisch seizoen. De Moeërebuuk hóbbe aafgeloupe jaor weer ein sjoëen vastelavesseizoen gatj.

Vorst Henri, dich bedanktj! Ouch de ganse vereniging en de comite's bedanktj veur de geweldjige tied dae wae same hóbbe gatj. Wae hóbbe veul plezeer gatj en dèk gelache. Wils se noe ein fleske beer?



De Kwakel

Prinsheerlik

Jaorgank 51

De rame stinge al ore ope veur frisse locht en prinses Jójce haaj zelfs op bed staon te springe, mer Paul vertoeëndje gein teiken van laeve. Hae haaj 't kwaod, in dae lèste van gister haaj vergif gezaete. Wie d'r oeteindelik toch oet bed kwaam en zich fris gedouchdj haaj, beldje hea de vorst op mèt de vraag of de optocht waas aafgelastj, want in det geval zoop Paultje weer ónger de dekes kroepe...

Ein eurke later sting de prins in vol ornaat op de wage, naeve zich eine ummer, dus klaor veur de optocht.



11versjille

WÈDDE!

Binne 't derdje elftal van ESV woort d'r gewèdj det Richard van Custers ziene baard neet dörfdje te laote staon zoeë-as Theo Janssen. Rich twiefeldje neet toen d'r ein vaat beer woort ingezatte en noom de oetdaging aan. D'r woort zelfs beslote eder weak ein zelfdje foto te make óm te kieke wie hel de baard gruudje. Helaas veur Rich doordje de wèddesjap neet lang. Mèt sliepe bleve ein paar vónke in de baard hange woeëdoor dae inne fik vloog. Rich heet toen beslote óm d'r toch mer wèt mèt de trimmer euverhaer te gaon.

Det lostj niks op

Bie de sint merte houp is 't eder jaor 'n drókdje. De kinjer loupe rónjd mèt heure lampion en kriege oliebolle en chocomel. Ouch veur de aojers is d'r koffie en glühwein te kriege. Marianne bestèltj zich 'n bekerke koffie en 'ne glühwein. Ze kaltj en kaltj en ze reurtj en ze reurtj, mer de mèlk en sókker losse neet op. "Huh? Wie kan det noe?" Bie de kräömkes haje ze toch gooj verleechting geregeltj, want wie det Marianne tegooj keek kwaam ze d'r achter det ze de sókker bie de glühwein haaj gedaon.

De boek vol

Ties (4 jaor) zijt smörges geregeldj aan 't ontbijt bie de familie Coumans. Op 'ne mörge steit Henrie aan de taofel snel 'ne bótterham te smere. Ties zijt zich det tafereel op zien gemaak te bekieke en trèktj ein conclusie: "Henrie, ich zeen des dich neet miëer hoofs te aete, want diene boek zijt al vol."

SomethingElls 2.0

Dao wore hieël veul ore in gaon zitte óm ein gooj reclamecampagne op te zètte. Aan alles waas gedachtj. Sjoëën borde bie edere ingank van 't dörp, de gevel ane zaal waas d'r klaor veur, everal waas geflyerdj en de veurverkoup kost beginne. Eva van Jos van Lemme regeldje 4 kaertjes, Jos hoofdje allein nog 't geldj euver te make. Det woeëj mer neet lökke, dus beldje Jos nao Mies van Evers. "Nae alles is good doordachtj, 't liktj mesjien aan diene tablet." Jos sjakeldje de bure in, toen waas 't probleem snel gevónje. Alles waas good behalve 't bankraekeningnummer, det waas "something-gans-get-anges". Wie det einmaol waas aangepastj, waas Jos zoeë van 't geldj aaf. Mèt ein good IBAN-nummer stèltj internetbankiere neet veul veur.





Timmerbedrijf - Houthandel
W. STEUTEN BV
 Fax: 0495-651478
 Mobiel: 06-53127981
 www.steulentimmerbedrijf.nl
 wimsteuten@hetnet.nl

**voor al uw hardhouten
 Kozijnen en Deuren**

Timmerbedrijf - Houthandel
 W. Steuten BV
 Graafkensweg 15B
 6037 RN Kelpen-Oler
 Open van maandag t/m vrijdag van 07.00 - 17.00 uur.
 En op afspraak.

Tel: 0495-652178
 Fax: 0495-651478
 Mobiel: 06-53127981
 www.steulentimmerbedrijf.nl
 wimsteuten@hetnet.nl

CUE
SUPPORT

Als gae ein gooj, en professionele, audiovisuele oplossing zeuktj, help ich uch gaer

Roger Creemers
0495 - 586260 | 06 28230498

Effe buurte mèt: Wiel Huijskens & Thijs Peeters

De Kwakel

Jaorgank 51



Woeë vreuger neet moeilik euver gedaon waerdje is in de loup van de jaore steeds belangrieker gewore: de vastelaoves optocht laote plaats vinje zónger óngelökke. Dao zeen speciaal opgeleidje minse veur die oplètte det de regels naogelaefdj waere, ze staon langs de hieël route in opvallendje hesjes en mèt de walkie talkie inne aanslaag.

Mèt Wiel Huijskens en Thijs Peeters ging De Kwakel in gesprek, 't zeen al aoj rotte in 't vak en weite dus veul details en anekdotes woeë gae wiezer van waerdj.

Wannieër is dit allemaol begost en kwome de regelkes?

Toen wae in 2001 begoste mèt dit werk deje Hein Seunis en Theu Stals dit al hieël veul jaore dus gank mer nao. In 't begin wore wae nog neet officieel verkieërsregeligieër, pas later waerdje 't 'n eis vanne gemeindje óm verkieërsregeligieërs te hóbbe as begeleiding vanne optocht anges kreeg se gein vergunning.

Mèt wieveul man zeetj gae noe en waat zeen de take?

't Team besteit oet Piet van Roij (veurzitter), Wiel Huijskens, Thijs Peeters, Jeanny Camp, Harm Maessen en Peter Heijkers. Eder jaor weurdj de route besproke en naogeloupe óm obstakels veur te zeen. As groep gaon wae eder jaor hie en dao 'ns kieke nao de wagebouwers. 't Is prachtig óm te zeen wie de jeugd óngerein dinger aanpakke en bie minse terecht kónne óm te bouwe en ouch gesteundj waere. Veur de optocht begintj controlere wae de wages. Dao maag geine alcohol of struue op ligge en wages mèt eine aggregaat mótte 'ne brandjblusser bie zich hóbbe. Ouch kieke wae of de deilnummers zich aan de reglemente haoje. Thijs löptj meestal veur de optocht oet, de rest verdeildj zich.

Wie geit det noe zoeë?

Alles waat de optocht kan belemmere mót ane kantj. Gelökkig is Wiel good mèt tek zaege en pälkes ane kantj doon. Gate inne optocht probere wae oet alle macht te veurkómme. Doe móst van eine kantj begrip kweke veur de deilnummer, vanne angere kantj mós se zörge det de vaart d'rin blijftj. Dit is dèk passe en maete. 't Sjoeeënste stök is altied 't lèste stök van de Sebastiaanstraot en 't kruuspuntj. Dao staon altied veul minse en det is leuk veur de deilnummers.

Nao de optocht mót bie de Prairie echt 't verkieër geregeldj waere dao is 't oeëts 'ne janboel en mótte wae alert zeen. As Harry Sieben de optochtnummers weer inne kist heet gedaon, en bie de Prairie oppe zólder heet gezatte, den weite wae pas det wae klaor zeen. As alles weer röstig is den bemeuje wae ós ouch nog mèt de puntjetèlling.

**PAS OP
MET
UITKIJKEN**

Höb dj'r leuke anekdotes?

De start vanne optocht waas vreuger drek naodet de lienbus bie de Prairie veurbie kwaam. Veolia hèltj tegewoordig raekening mèt de optocht in Èll en lieëtj gewuuen ein rit vervalte.

T'r huuegdje van Hubertushof zaat 'ne zwaore tak inne weeg en dae zoeëj en móst d'raaf. Eine oplèttendje mins wist later te vertèlle: "Gae höbtj gelök gadj det dae tak aafgeloupe nacht d'raaf geweidj is, noe kinne ze good door," mer de goje mins zaag neet det dae tak gewuuen aafgezaegdj waas.

'ne Kieër wie de optocht al zoeëget langs waas kwaam de pliesie. Wiel zagt toen: "Gojemiddig hieëre, wiltj gae hie nog 'n keteerke wachte?" Mer det deje ze neet, ze dreidje zich óm en reje weer wèg. Wiel is nog euvertuugd det det controle waas.

De fanfaar löptj tegewoordig weer lever veurop den det se op 'ne wage zitte. In zónne wage zit se neet röstig en de kans det dich 't instrument door de lup geit is groeët.

Wiltj gae nog örges mèt aafsloete?

(In koeër) Óm vriewilligerswerk vol te haoje is 't belangriek det die minse oppe tied 'ne pluim en 'n bedankje kriege veur al 't werk waat gedaon is en det geldtj neet allein veur 't optocht comité!!

Manne bedanktj veur dit gesprek, jaomer det t'r neet genógt ruumdje is óm al uch verhaole in kwiet te kinne. Gae dootj belangriek werk en gaefjt 't geveul det 't veur de toekomst waal op 'n veilige maneer good kumtj. Ouch aan uch collega's succes gewinstj daomèt.



De Kwakel

Jaorgank 51

Hub in Paries, ich de ieëste pries



Eder jaor is Hub van Luute drök bezig óm op 't lèste moment ein idee oet te veure in de optocht as einzelgänger. Veurig jaor ging det neet lókke, ómdet hae in Paries aan 't werk waas. Zien broor Peter waas ouch mèt óm hum te helpe. Wie ze aan 't werk wore bleek det ze ein deil lampe wore vergaete en Peter booj aan óm effe op en nieër te rieje. "Zoeë gepieptj!", zeet Peet en hae vertrócht richting Èll. Wie hae Paries oet waas ging Peter aan 't belle aan. Want vriedigs haaj Marlies get gezagt, waat hae hieël good kost gebroeke! As hae flink doorreej zoj d'r oppetied in Èll zeen, hae móst allein ein bietje hulp hóbbe van thoes. Wie d'r in Èll oetstaptje stinge ze al klaor mèt ziene witte blouse en 't bórdje veur ómme nek: hae kost mètloupe inne optocht! Saoves inne zaal waas 't fieëst hieëlemaol cómplieët: Peter mocht 't podium op óm de ieëste pries aaf te hole! Nao de priesoetreiking heet hae d'r neet veul mieër gedronke, hae is snel weer inne bus gestaptj, want Hub zaat in Paries te wachte op de lampe!



De naakte waarheid

Veerle Greijmans waerdje op eine daag toegevoegd aan eine app-groep mèt allemaol 06-nummers die ze neet kost. Ze dacht: "Laot ich mich ins van miene bèste kantj zeen, ich vraog netjes weem 't is." Toen ze eine selfie mèt de tekst "Hallo wie zijn jullie?" d'rop zat doordje 't neet lang veurdet ze neet mieër in dae groep zaat...

Meug

Cas is hertstikke gek op LEGO. As hae 'n dueske kriegtj wiltj 't menke drek beginne mèt bouwe. De bouwtekening weurdj stepke veur stepke gedöldjig gevolgdj óm oeteindelik klaor te hóbbe waat oppe veurkantj van 't dueske steit. Cas heet mèt zien 5 jaor al hieël get LEGO-bouwwerke in-ein gezatte.

As hae op 'ne daag 'n noew dueske kriegtj wiltj d'r dao weer drek aan beginne, mer papa Josh haaj aafgesproke det ze zoeëje gaon aete bie opa en oma Hermans. Dus de LEGO móst

wachte totdet hae weer thoes waas. Det meindje Cas efkes snel te regele, wiedet 't aete op waas vónj hae det opa en oma d'r meug oetzoge. "Ich dink det wae nao hoes mótte, want oma en opa zeen meug." ...

En det haaj écht niks mèt de LEGO te make!!



MIJN BUURT MIJN SPAR

SPAR DERKSEN
SEBASTIAANSTRAAT 12
6011 RE ELL 0495-551285



Oet de aoj doeës: 1975

Al maondje van te veure wist Jan van Meerte det hae de noewe prins zoj waere. Mer thoes mook hae dao geine kal van. Den kost moder Mia zich ouch neet p'r óngelök verkalle. Mia waas in dae tied aevogood benoedj nao de prins, want ze waas erg betrokke bie de vastelaovendj. Ze probeerdje zoeë links en rechts get te vèsse bie de minse die d'r mesjien weit van koste hóbbe. Twieë daag veur 't oetrope haaj ze van buurvrouw Nelke begrepe det heure eige zoon det jaor de prins van de Moerebuuk ging waere. Ze waas óntzettend blie en verrastj en ze haaj d'r alle begrip veur det Jan tege heur niks haaj gezagd. Toendertied waas 't gebroek óm aan 't inj van de aovendj bie de prins te gaon aete mèt 't ganse gevolg. Mia regeldje in 't geniep vlaai, bruuedjes en genógdj drank in hoes. Ze dèkdje de taofel en waas benoedj nao Jan zien gezicht. Ze haaj det toch mer sjoeën geregeldj zónger det hae dao get van aaf wist. Tege vief oor in de mörge kwaam Jan heives, moormins allein. Hae haaj al lang van te veure geregeldj óm mèt de ganse bups bie Lemme te gaon aete ...De rest van de waek hóbbe ze ónger heur beije allein mer vlaai en bruuedjes op 't menu gadj.

GRATIS SPORTE!

Jari Klaver geit al waeke nao de sportsjoeël. Hae traintj en traintj zich eine ganse böltj spiere. Vader Wim wiltj det ouch ins probere en kan op ein introducékaart eine kieër mèt Jari mèt. Waal lekker zoeë 'n eurke sporte, det smeuktj nao mieër! Wim wiltj dèkker mèt, mer hae wiltj gein abonnement betale. Hae bedinktj ein plan en geit mèt as 'Oom Piet', as 'Neef Hans' en as 'Neef Paul'.

Henderikx
UW GROENE vakwinkel

Vastelaovendj Same!

Weverstraat 5A 6013 RA HUNSEL Tel.: 0495-786807
ALLES VOOR DHZ, TUIN & DIER

Voege kratse

Stefan Bongers heet vanne zomer ein noew graasj gezatte. Hae heet det allemaol zelf gedaon. Hae lèktj stein, plaatstj 'n noew daak en wiltj ouch zelf gaon voege. Effe eine steiger bouwe óm de voege oet te kratse en hae begintj. Mer Stefan haaj neet eine ganse steiger gebouwdj en vèltj ómlieëg. Haaj d'r toch mer de tekening aangehaoje!



KEBENG!

Zoeë-as eder jaor ginge ouch aafgeloupe jaor 'n deil ruig manne mèt de motor nao de TT in Assen. Ruud vanne Sus is gein 18 mieër en haaj nao twieë alikke daag zoepe waal ein powernepe nuuedig. Wie Ruud in zien droume lekker ónger de palmbuim op 'n wit strandj laag, goeëdje ein van die anger jóng eine strieker ónger ziene stoel. Ruud sjrók zich hieëlemaol 't apezoor en spróng twieë maeter de locht in. Wie d'r weer oppe gróndj sting vloodkje d'r alles bie-ein en woeëj ein paar veurbiegangers aan 't vel gaon. De rest vanne groep sting inmiddels mèt traone inne uig te lache en repe Ruud mer verstenjig trök.

LANGS DE DEUR GAON

Den belle ze aan en vraoge of se de vereniging wilt steunen. Piete-ummerke, pleisters, Paoseikes, verjaordaagsenvlöpke, unieklothe, aod iezere, gladiole, heitje veur karweitje, kinjerpostzegels, de kirkbiedrage en den hóbbe wae de gezamelikke acties, van 'n stök of 8 gooj doele, nog neet genumdj. Doon euveral aan mèt mer lang neet altied aeve veul.

Ich gaef niks óm gladiolen mer vinj 't sjoëen det ze zoeë actief zeen mèt de paerd, gaef niks óm Paoseikes mer weit waal det 't allemaol zat kostj. En natuurlik kostj de intocht van Klaos mèt zien Piete geldj en det geldtj zeker ouch veur de instrumente vanne fanfaar. Ich hób tössedoor get loeëd en aod iezere nao de container gebracht, en noe liktj niks ane weeg. Dju, mót ich mich hoeke, mót ich zègge det ich neet thoes bèn, of gewuuen 2 Euro's mètgaeve? De kirkbiedrage det doon ich via de bank, dao zal de sjoorstein toch ouch mótte blieve rouke en as emes doeëd geit wilsse toch effe nao de kirk. Die gezamelikke doon ich ouch via de bank. Mer zeet ze mer 'ns te kriege, die minse die det werk ederes kieër weer doon. Det langs die deure sjoëje. En den veuraaf al wete woeë se zeker niks kriegst. Nae, det is niks veur mich. Ich weit wannieër ze kómme, die vanne Kwakel.

*Den liktj €5,00 oppe trap. Zoeëje ze dae daoveur kónne laote make?
As ederein mèt duit waal.*

Z.A. Nikbet

Kirmis of Vastelaovendj

'Veur 10 Bónne Lol' deej mèt aan de Bontje Aovendj. Zoeë wie wae van heur gewintj zeen, ginge ze ouch noe weer mèt heure camera door 't dörp. Ze vroege Siem of ze dao mochte filme in 't zaelke. Nateurlik waas det gein probleem. Siem leet zich van ziene bèste kantj zeen en bouwdje zien podium op, verseerdje alles in roeëd-gael-greun en stóng trots op die van 'Veur 10 Bónne Lol' te wachte. "Braek mer weer aaf," zagte die jóng, "ós stökske speultj zich aaf mèt de Kirmis."

Wisj dj'r al...

- det Christa op 1 april vertèldje det d'r ein groeëte verrassing aan zaat te kómme
- det de jónges drek wiste waat det beteikendje: mam waas zwanger!
- det ze de rolle ómdreidje wie bleek det 't ein 1-april-grap waas en ein geboortebericht zatte in 't krentje op heur vast vakantieadres
- det Christa euverlaje waerdje mèt felicitaties via facebook en kaertjes vanoet Terschelling
- det May oppe seniore middig eine buut deej
- det ze weer veul aanein zanikdje en alles wist te vertelle euver torre
- det adjudant Jarno aandachtig zaat te loestere en aan jeugdprins Bart vroege: "de vibra tor? die tor kin ich neet?"

Veur eine appel en ein paer
gaotj gae nao
fruitbedrijf Moors
haer.



Alles op ziene tied

Bram van Ans en Frans is lever lui den meug. 'n Kwarteer veurdet hae nao sjoëel mót kumtj hae oet zien bèd en racetj den zónger get te zègge of te aete nao sjoëel op zien fietske. Op sjoëel aangekómme kwaam hae d'r 'ne kieër achter det hae zien sjoëeltas waas vergaete. "Dju....des waal lestig" dacht Bram en heet toen Quincy Beurskens gevraagdj óm zien tas op te hole, dae haaj toch 'n eurke oetval. Quincy heet toen bie Boeëne de tas opgehoojd en is mèt twieë tasse nao Wieërt gefietstj.



Custers Taaladviezen

Veur Frans spraeke
mèt lef:

Jan van
Meister Zef



De Kwakel

Jaorgank 51

Geine ezel?

't Waas inmiddels ouch tot Wullum doorgedronge det Piet eine biezunjere mins is. Hae hoofdje d'r den ouch neet euver nao te dinke: 't behaagdje de keuning óm Piet te ieëre mèt ein lintje. Det móst geveerdj waere mèt ein tuinfieëstje. De koffie waerdje aangezatte en catering bestèldj. Mer wie ze de groeëte tent woeëje opzette haje ze toch ein probleem: Piet haaj de tent aan Ron oetgelieëndj, veur 'n project van zien bedrief. Gelökkig waas 't good waer en kóste ze ouch zónger tent gezellig toaste. Ein paar maondj later waas Piet jaorig, wederóm reje veur ein fieëstje! Ouch noe zoje d'r veul gaste kómme en ... ouch noe waas de tent bie Ron.

De lekkerste soep!

Christianne bringtj waekelijks de nuuedige eurkes door inne keuke óm d'r veur te zörge det d'r dageliks verse soep oppe taofel steit. Want det ze good kan koke maag dudelik zeen. Veural as ze op 'ne goje daag aan 't aete zeen en ein van de kinjer zeet: "Mama, dit is écht de lekkerste soep die ich oeëts hób gadj!" Doe zoeëts dinke det Christianne roeëj wange kreeg oet verlaegeheid, mer wae dinke det 't mieër oet sjaamdje waas ... Want oetgeraekendj dae daag haaj Christianne geine zin gadj te koke en haaj dus mer snel 'n blik oopgetrokke!!



Moeëre te koup

Eder jaor heet Mia van Roij d'r weer eine houp werk mèt. Groeëte moeëre veur minse mèt eine hoeëge vlaggemast, klein muuerkes veur achter klein raemkes, middelmaotige moeëre veur de bure. Mia neitj gaer én det bringtj get op. Op ein bericht in 't gemeindjeblaedje det d'r nog moeëre te koup wore beldje eine Foekepotter oet Grathem. "Ich laes det gae moeëre verkouptj, waat koste ze?" Mia numdje de pries van hieël groeët nao klein. "Is det per kilo of per zak?" woeëj dae mins wete. "Nae per stök!" zagt Mia. Dae Foekepotter vónj ze erg deur. "Kan ich mien paerdj baeter haver gaeve of sókkerkrotte."

WISJ DJ'R AL...



- Det Bo Tunissen waal ins douchtj mèt de zök en óngerboks aan
- Det ze daonao nog ins ging douche, mer toen mèt de ouge toe
- Det ze door det gehampel neet oppe tied bie Siem waas
- Det Bo van Frank van Hover ziene kauwgum achter 't oeër plektj as d'r ein snoepje itj
- Det dae kauwgum hel weurtj as d'r dao twieë daag zitj
- Det Bo dae toen oet zien haor leet knippe door de Vervaelers
- Des se dao oppe familiefoto niks van zuust, hae kiekjtj nao rechts.
- Det Bas Moeëne good vleis kan braoje
- Det Bjorn Geraerds dao mèt de BBQ van 't twieëdje euver twiefeldje
- Det hae vroog: "Is mien kip gaar, of krieg ich dao Himalaya van?"

!!!! Super daddy to the rescue !!!!

Nao de geslaagdje versie 2.0 van SomethingElls waerdje d'r nog get gedronke en gefieëstj op de afterparty. Tege 'n oor of 5 vónj Carolien 't welletjes. Óngerweges merkdje ze det ze de sleutel waas vergaete, mer och, gelökkig waas Steef al ein paar oor ieëre heives gegange. Mer Steef waas deep in droumelandj, hae woort neet wakker van de bel en neet van 't geklop. Hae sleep door wie de telefoon ging en hae huerdje neet 't geroop ónger ane deur. Gelökkig woeëntj papa Har neet wiet wèg, hae huerdje de noeëdkreet waal en is toen as de wiedeweerga in pyjama de reservesleutel nao de Niesstraat kómme bringe.



Wage bouwe op as-goonsdig?

Ómdet prins Paul enthousiast medewerker is van de spoeëketocht, haaj Bas van Moeëne eine tunnel inein getummertj en leep same mèt de wichter as spuuekske mèt in de wichteroptocht. Nao aafloop waerdje d'r gehostj bie de Prairie en Jeroen booj aan óm de tunnel murge nao Kelpete te bringe in zien bus. Den hoofdje Bas d'r saoves neet mèt euver straot. Claudia waas wirke en beldje op óm te polse wie 't thoes ging. Jeroen vertildje det d'r net 2 oor gepóngeltj haaj óm dae tunnel aaf te braeke. Det dink waas waal hieël degelik gemaaktj. Claudia wist det Bas de tunnel nog woeëj gebroeke óm te speule. Ze stèldje veur óm Bas te belle en te vraoge of 't ein probleem waas. Mer det zaag Jeroen neet zitte, hae zuchtje ins deep en heet toen de tunnel weer inein gezatte.



Slagerij Ruud & Marleen Heijkers

Hèt adres voor
koude & warme buffetten en barbecue's compleet

Sebastiaanstraat 19 Eil tel. 0495-551242
www.slagerijheijkers.nl

Miëtje te klein

Bie de familie Bongers waerdje 2015 good ingeloejd. Mèt champagne, get seerpielkes veur de wichter -dus neet zoeë sjoëen as det vanne bure- en mèt z'n alle gezellig rondjóm de veurkorf. Wie de gaste trök nao Èll wore en de jóng op bed loge, bedacht Anita det ze nog waal effe 't wasmesjen kóst aanzette. Den waas dae geur van 't stoke innegang oet de jeskes. Helaas wore de jeskes neet opgewasse tege 90 grade, dus op 2 janewari kreges Stan, Max en Kay eine noewe jas!



De Kwakel

Jaorgank 51

(In dees oetgave kruuptj Ellske inne rol van 't Kunstwerk op 't Scheymansplein.)

Det roeëd menke det dao 't hieël jaor steit te staon mèt det roeëd vruike zeen al 23 jaor "hét kunstwerk" van 't plein. Dao geit vanalles door dich haer asse d'r langs kumst. Geise nao ein begrafenis den zuus se mètlaeve en soms 'n bietje griene. Geit d'r eine voetballe den juiche ze hum toe asof winse ze hum succes. As t'r om half zeven heiwes geit vraoge ze zich aaf of het dit seizoen nog good geit kómme. Dit kunstwerk laeft mèt ós mèt. 't Kreeg in 1992 van ziene kunstnieër Dick van Wijk de naam "de Ontmoeting". Kwaam dao te staon ómdet Ell 't gereidkómme van 't centrumplan veerdje. Veural aafgeloupe jaor heet dit Kunstwerk 't zwaor gadj.

't Kunstwerk ergerdje zich ...

Haje die vanne buurt de Pannestert in 2008 heur bèst gedaon om 't plein get op de fleure bleek det ze 't Kunstwerk wore vergaete. Niks óntmoeting bie "de Ontmoeting".

De blomebek veur de winkels (liggelik door de gemeindje dao geplaatstj want ze stónge wie ein vot en mochte sjenbaar toen al niks koste) waerdje echt mèt vrolikke kleure gevèrdj, mer emes hooft det neet sjoen te vinje. De winkels vónje 't mer lèstig, gein plaats mieër veur de fietse. En weem kwaam de drek plökke? Waas det de taak van Theo en Sjaak, of zoeëj de buurt det zelf doon? 't Kunstwerk ergerdje zich d'raan det ter gein blome wore veur heur. Den mer 't plein oppe sjóp.

Waere d'r opins zoeëveul containers op 't plein gezatte detter knap gein plaats mieër is om te óntmoete. Kroppe menke en vruike get korter bie-ein waat zie waal fijn vónj. Mer gein plaats mieër veur auto's vanne kieners, gein plaats mieër om te kónne pinne. En nondedju waat zoeëj det lang gaon dore zèk. Waat meine die vanne gemeindje zich waal neet. Veur Ell-kirmis alles wèg? Mós se Hein en Wim ins vraoge. Nae 't Kunstwerk kost t'r almer neet aan winne. En wie 't d'r net aan gewindj waas, wore de containers alweer wèg. 't Waas bienao kirmis.

't Kunstwerk gruweldje ...

Waat 'ne chauffeur. Riedj al jaore op eine groeëte vrachtwage, kumtj al jaore "God-weet-hoeveel-jaren-ik-hier-al-sta-voor-een-habbekrats" en duutj gewuuen effe ein pan kapot. "Hób se zeker neet gezeen hè." "Zeker niks van gemerktj hè." "Zoeëje die men verzekerdj zeen of geit det weer op kóste vanne gemeindje?" "Die dörve dao toch niks van te zègge, angsthazel!" "Oh, is 't gemeldj?" "Oh, waas t'r verzekerdj?" "Oh, det weurdj dus toch opgekaptj?" 't Kunstwerk gruweldje... gein gezicht zo'n kapotte pan. "Det geit klauwe vol geldj koste om det te reparere." "Al die laoge die d'r bove zeen mótte d'rvan, det hób ich al lang gezeen." "Waat is klaor, desmörge waas t'r det gaat nog, den mót 't eine vakman zeen gewaestj, anges kan 't neet!"

't Kunstwerk heet ein tummermansoug ...

"Waat lómp" mót 't Kunstwerk hóbbe gedachtj. "Woeërom mich neet effe gevraagdj?" De Ontmoeting steit al jaore paol te haoje en wètj as nemes anges baeter det de gymzaal ein stök hoeëger likt den de deur vanne Rabobank. (Hae zagt tege heur det hae sjadje van zón 75 toet 80 cm verval van gymzaal toet ane veurkantj.) Dao hoof se gein studie veur gevoldj te hóbbe. Gewuuen kieke en ein bietje naodinke: "Mer nae, nemes niks vraoge, gewuuen beginne en wae regele 't waal zelf." Probleem leek opgelostj mèt ein trap en ein lift en "deels met extra-werk". Mer Pieëre van Berbe kost t'r mèt de røndjleijing tiejes de Dörpsraodsvergadering gein gebroek van make. "Mer veur mich is det gein probleem," zeet Pieëre, "ich gaon nao geine wèdstried kieke van Bach SV. Ich woeën feitelik in Rooy en ouch dao gaef ich niks om volleye." "De Ontmoeting" blyft d'r bij det d'r veuraaf baeter haaj mótte zeen naogedachtj. Hae zagt lèst nog tege heur: "Wore wae toch mer nao die bie-einkomste gegange en haje wae den dao mer get laote huure. Det haaj 'n deil kal en veul geldj gesjildj. Mer jeh, achteraf kalle is dèk gemèkkelik."

't Kunstwerk wiltj neet mieër alle buim trök ...

"Op ein plein mótte buim staon, sjoen en groeëte buim, dao mót alles veur wieke." Det waas waat de vrouwelikke helft van "de Ontmoeting" zagt tege dae mins dae ze dao tege kwaam. "Det kin se waal zoeë vinje mer het plein is t'r ouch veur as 't kirmis is, en veur as t'r ein drökke begrafenis is, of veur as de vèswage kumtj." En toen bleek det t'r ouch nog ein plaats móst zeen veur de kerstboom vanne Dörpsraad. Dae kwaam allein in December.

En ónger die noew buim mochte gein kabels of riool of waterleidinge ligge. "Des nog geine katterpis óm det allemaol te combinere. Haje ze indj jaore zestig van aod Nies mer Gemeindsjapshoes gemaaktj. Haaj 't plein örges anges gelaage en waas d'r zeker zat plaats gewaest veur groeëte buim." Hae vreugtj heur:

**"en dink se det wae d'r den
oeëts wore gekómme?"**



Ellske

Kritisch, sjerp en oplèttendj. Det is Ellske. Dees aof tante duit op heur eige meneer

verslaag van waat ze zoeë-al hie inne buurt heet gezeen of gehuerdj.



11 versjille antjwoord

1. Diadeem van prinses Joyce, 2. De kèting van Tiny, 3. t Haorstökske van Paul, 4. Gesp op manjef Paul, 5. Sniwerk oppe veurste kirkbank, 6. Bakkabaard van Jeroen Bongers, 7. Vrouw bie 't wiewaterbekske, 8. t Name-leikerke ónger de raam, 9. De vot van de prinses, 10. t Roed-gael-greun in sjaal van Theo Stals, 11. De vierdje state

VEUR EIN SJIEK BEDRIEFSFIEËST
OF ANGER EVENEMENT



G E S T I Q U E

Jan Koolen
06-10202048

Ron van Roy
06-47121916

De Kwakel

Jaorgank 51



... wat zijn je takken
wonderschoon

Kerstmis waas veurbie en Math van dae Greune Vakwinkel richting Hunsel poodje ziene kerstboom inne hoof. Den kost hae dao 't volgendj jaor nog 'ns van geniete. Nao de vastelaovendj kwome De Vervaelers 't gerei van heure vastelaoveswage opstoke en ze kregde dae boum in 't vizier. Die vervaelendje men deje heure naam ieër aan: ze rete dae boum oet de grondj, zatte 'm op 't veur en poodje de geruuesterdje kerstboom daonao netjes trök in 't gaat. "Snap neet det dae boum aan't ruzele is gegange," zagt Math.

EETCAFE
DE PRAIRIE

RESTAURANT | ZAAL | CATERING
Kijk op www.eetcafedeprairie.nl

Richting de goje kantj



Gehieël in 't thema van de KVV-waek ginge de kinjer van groep 6, 7 en 8 heur grenze verlègge. Daoveur móst d'r nao Brunssum gereje waere, want dao is 'n sjiek parcours waat des se oppe bloeëte veut móst aaflegge. Jordi haaj 't adres inne TomTom ingevourtj. En ouch zaat d'r eine extra leider naeve hum om op de route te lètte. 't Kost dus neet misgaon zoeëts se zègge. Mer halverwege Indjhone höbbe twieë wages zich toch mer omgedreitj, zoeëdet ze waal richting 't zuide reje. "Jeh," zagt Jeroen Cauve achteraf, "ich bèn achter hum aangereje om te waarsjuwe det hae de angere kantj op móst!"

GOOD VOLLEK!

Nao ein grandioos prinsebal 2015 woorte d'r frikandelle gebraoje bie de kersverse prins thoës. Ruud vanne Sus zoj ouch nog kómme, mer dae bleef waal lang oet. Zien excuus: "Ich höb flink motte zeuke. Ich dacht die kloeëte mich, alle lampe wore oet! Most ich dao ieëst naeve dae wage doorsravele door die dónkel graasj. Toen kwaam ich achteróm in ein sèrre en dao waas weer ein anger deur. Wie ich einmaal inne keuke kwaam, sting ich bliikbaar bie de bure!" Geine dae 't geluifdje, mer d'r waerdje aevezieër flink gelache. En Ruud kreeg snel zien frikandel, den waas d'r effe stil. Hae oot die mèt smaak op en wie hae zagt: "Ich gaon zègge det ze de deur mótte sloete." haaj d'r weer de lachers op zien handj. 'n Paar daag later kwome Frans en Gerda bie Paul felicitere. "Ich hoop neet det gae zunijg te vreug wakker zeetj gewore," zeet Paul, "we höbbe hie nog mèt ein paar man de frietpan aangezatte." "Wae neet," waas 't antjwoord, "mer de bure waal! Dao heet d'r eine ónger ane trap staon te rope: "Good vollek! Hey! Gae mójt waal de deur sloetel!"

LEEF KETJE

Al 'n hieël tiedje höbbe Robert en Carla en de wichter ein ketje. Ze zeen gek op det leef bieëstje en Robert mesjien waal 't meiste. 't Ketje hëljt neet van stilzitte mer is alied ane wanjel binne en boete. Klumme vintj 't ouch spannend, aaf en toe zitj ze ane euverkantj vanne straot inne boum achter de mösse aan. Mer op 'ne daag waas t'r toch lichte paniek in huize Heijkers, de kat waas al 'n paar daag wèg! Leiden waas in last en de kinjer en Robert wore haost neet te truueste. Gelökkig zitj dao get pliesieblood in det gezin dus waerdje 'ns röstig stap veur stap naogedacht waat t'r gebeurtj kost zeen. Snel genógt haje ze 't gevónje, 'n combinatie van det de kat gaer op óngerzeuk oetging en 't feit det de bure net op vakantie wore bracht de oplossing. Inderdaad, 't bieëstje zaat bie de bure binne en haaj zich al hieëlemaal heis ge-miauwj. De bure haje bie vertrèk niks inne gate gatj wie det 't ketje binnegeslope waas. Gelökkig kost ze snel bevriedj waere en mankeerdje 't niks. 't Leef ketje waas snel weer de aoje, mer of ze d'rvan gelieërdj heet ...?



Muzikaal talent

Ze zote met 'n paar man get te zeivere euver muziek en in eine kieër heet Carolien Breukers 't euver Annemarie van Kimmenade. "Die duit mèt aan SomethingElls en ze is super muzikaal en kan good lieëre," waas Carolien aan 't stute euver Annemarie. Ze heel mer neet op en zagt: "wèt se ouch det ze studeertj aan 't crematorium... (!!!)."

Koppien? Boekpien? Pien aanne kneuk? Slecht dr aan?
Stoppe met rauke? Gezonjer leave?

Op zeuk noa ein oplossing op natuurlikke basis?

Acupunctuur Massage
Hotstone Mens en dier
Bioresonantie NLP
Homeopathie Detox
Breathfulness Faalangst Training

Laup es binne bie Esther Hendrix, Centrum 'New Life'
Breeven 12, gratis spreakoor: maandigmurre van 8:30 tot 9:30

Jeugdprins Sven Jeugdprinses Lise

Ich bèn jeugdprins Sven

Zoon van Peter Konings en Wendy Kierkels
Twieëlingbroor van Fabiënne
Woeënachtig oppe Sebastiaanstraot inne buurt Pannestert

Op 26 januari 2004 bèn ich in Èll gebore
En in dit sjoëen dörpke groeët gewore
Op basissjoeël De Verrekijker zit ich in groep 8
En det ich hie als prins zoj staon haaj ich gehooptj,
mer neet verwachtj

Voetballe doon ich bie RKESV op 't voetbalveldj
En mèt gamen bèn ich in Minecraft eine echte heldj
Speule doon ich veul mèt Miley, miene hóndj
En daomèt loup ich ouch dèkker 't trapveldje rón dj

Oppe jeugdbóntjemiddig speuldje ich de Witte Prins
op 't Knappe Paerd. Mer det ich hie as echte prins staon
det is mich veul mieër waerd
Zef is deze vastelaovendj miene adjudant
En daomèt hos ich die daag door 't Moeërelandj

Ich bèn jeugdprinses Lise

Dochter van Jan Sentjens en Marjan Knapen
Zus van Fran
Woeënachtig oppe Antoniusstraot inne buurt Antonius

27 januari 2004 is de daag det ich gebore bèn
En daomèt bèn ich precies eine daag jóngler den
jeugdprins Sven
Op basissjoeël De Verrekijker zit ich in groep 8
En det ich hie as prinses zoj staon haaj ich gehooptj,
mer neet verwachtj

Op miene iPhone doon ich veul aan snapchat en instagram
Mer det moog ich neet te lang doon van ós mam
Daoróm speel ich ouch veul mèt Tommy, miene hóndj
En den vlege de kósses bie ós thoes in 't rón dj

As kleindochter van twieë aod-prinse
Wil ich ederein alvast veul plezeer winse
Det doon ich same mèt Veerle,
miene adjudant
En daomèt hos ich die daag
door 't Moeërelandj

Wae laote alle Moeëre en Moeërinne 't volgendje wete:

Det wae Bart en Irene wille bedanke veur aafgeloupe jaor
Bart en Irene bedanktj, gae zeetj noe klaor

Mèt adjudante Zef en Veerle gaon wae oet ózze bol
Daomèt hóbbe wae deze vastelaovendj de groeëtste lol

Det de ganse jeugdraod achter ós aan geit wie eine trein
Mer dao hóbbe wae 't volste vertrouwe in óngerein

Det wae same mèt de groeëte prins d'r ein sjoëen fieëst van
kónne make En det wae ós regelmaotig de lange oet 't lief kónne kake

Det ederein dees daag good gek duit
En neet wie ein druiloer ane kantj stuit

Det wae veul kinne lache, hosse en tampieëste
En tot inne late eurkes door kinne fieëste

Det jónk en aod mèt ós veul plezeer gaon belaeve
Dao wille wae ós deze vastelaovendj hieëlemaal veur gaeve

Det wae dit jaor zeker veur joker gaon staon
Want det is de orde woeë wae de vastelaovendj mèt in gaon

Wae winse uch allemaal eine sjoëene vastelaovendj
toe ónger ós motto:

**MÈT ÓS GEIT 'T WAAL LEKKER
MER 'T KAN NOG VEUL GEKKER!**



Winnendj leedje

Couplet

Tis weer kirmis 't geit gebeure
De noewe prins dae weurtj gevraagd
Ederlein is drök aan 't raoje
Mer ich bèn nog neet gevraagd
Ze zègge det 't ein van ós geit zeen
Ze zègge 't waas toch ziene droum
Wae gaon 't zeen as t'r hie de zaal in kumptj
Jao weem kumptj oet de stoum

Refein

Dus maak mich gek weem geit 't waere
Zal 't ein van ós gaon zeen
Al dae tied hób ich aan dich gedacht
Mer noe bèn ich 't weer kwiet

Zunjig middig de kumst vreug bie-ein
Steit t'r hie al aan de bar
Zèk, weem kaltj d'r 't ieëst vanne prins
Dae toch neet, bès inne war
Waas ich toch mer gevraagd dit jaor
Den waas ich d'r sjoëen vanaaf
Nog 'n oor en den is t'r bekintj
Wae gaon noe nao de zaal



Tekst & muziek : The BoyBent



De Kwakel

Weurdje vanne redactie

Deze kieër haje wae mieër as zat óngerwerpe óm euver te sjriev. Wae hóbbe beslote óm neet alles waat aan ideeë is aangedrage ouch op te numme. Wae zeen waal op zeuk nao eine oetgaever dae wiltj mètdinke euver 't damesmaondjblaad CAROLIEN. Wae zeen blie mèt Daniëlle as oetbreijing. Ze wètj veul, kan good zwiege en as ze euver ein paar jaor wiejer zeen mèt de verbouwing moge wae bie heur thoos gaon vergadere. De jónges zitte den toch op kamers. Mocht 't zeen det gae wilt reagere op dees oetgave den kóntj gae terecht bie:

Bram Camp, Paul van Miet,
Daniëlle van Tjeu, Rianne Goldenbeld,
Nicol Orbon en Jos van Lemme.



Bakkerij Thijs Koolen

Centrum 'New Life'

Wim Steuten

Spar Derksen

Garage Heemels

Landgoed Lemmenhof

Linders kwekerij

UGV Henderikx

Fermate

Bep van Oosterhout

Gestique

Winkelmolen timmerwerken

CUE-Support

Jan Custers Taaladvies

Slagerij Heijkers

TNT - Licht en Geluid

Nicole Moors fruitbedrijf

Gestique

Eva Strous
De Prairie



CV de Moerebuuk
Januari 2016, Jaorgank 51

Vastelaovendj 2016
www.moerebuuk.nl

De Kwakel is ein oetgave
van 't Kwakelcomité